

# DEO OPTIMO MAX.

UNI ET TRINO,

VIRGINI DEI-PARÆ, ET S. LUCAE,  
Orthodoxorum Medicorum Patrono.

## QUÆSTIO MEDICA,

CARDINALITIIS DISPUTATIONIBUS

*manè discutienda, in Scholis Medicorum, die Jovis vigesima-octavâ  
mensis Martii, Anno Domini M. DCC. LXV.*

M. CAROLO GEILLE DE SAINT-LEGER,

Doctore Medico, Præfide.

*An prolem\* lactare Matribus saluberrimum?*

I.



CEMINA non tam sibi, quàm procreandis educandisque liberis nata. Vix dùm bis septem complevit annos, hanc mox fore viro naturam prænuntiant mammae sororiantes, lumborum gravitas, dolor coxendicum, spontanea artuum lassitudo, ciborum fastidium. Hæc symptomata brevi fugat manans ex utero sanguis, puellamque toro prorsus habilem efficit. Menstruâ quaque periodo, pari stipatus comitatu, effluit redundans humor sanguineus, donec utero gerat mulier; tunc ut plurimum cessant Menstrua, humorem superfluum matrigue inutilem in sui nutrimentum absorbente fœtu. At parum esset naturam non nato infanti providisse, nisi & adhuc à matre recentis mollitudini accommodatum parasset pabulum. Illud esse mammarum munus. Ut primum è carcere materno in auras prodiiit tenellus homuncio, protinùs non jam distenta amplius uteri fornix constringi, vasa ipsam affluentia ad nativam redire diametrum, contenti humores, hinc Lochiorum nomine foras emitti, illinc retrò conversi vicina lacè loca distendere, turgescere uberiori sanguinis copiâ arteriæ Epigastricæ, appellenti per sibi copulatas mammariarum internarum ramificationes sanguini fortius resistere, ille per ramos ipsimet mammarum substantiæ prospicientes ferri copiosius, illos ampliare, mammae hinc dolere & intumescere, hinc lacteus humor à sanguine separari, primis à partu diebus dilutior, spissior, deinceps evasurus, cum sensim sine sensu laxatâ mammarum compage, spasmus & dolor remiserint, amplioresque caseosis & butirofis partibus patebunt viæ. Lac tali secretum artificio quantum puerulo conveniens est alimentum, tantum matri omnino est inutile, quin etiam ejusdem sanitati infensissimum, nisi eadem emulgeatur, quâ secernitur proportione. Candidos igitur latices tenero vagitu efflagitanti puero surdas ne præbeat aures mater puerpera, ipsam pudeat, à feris sylvestribus materno in natos amore superari. At si, vel feris ipsis feriozem, nulla propriæ prolis tangat cura, sibimet ipsi saltem consulat. Ocius infantulo sugendos denudet lactei roris eburneos fontes, fumiorem inde sibi certò comparatura sanitatem. Illud enim saluberrimum esse nullus inficias ibit, cujus beneficio, foras amandatur humor materno corpori inutilis, qui tum in valis excretoriis commorando, tum ad massam sanguineam revertendo, morbis curatu difficillimis daret occasionem.

\* Auctore Theodoro Baron D. M. P. an. 1741.

**E**A est humani corporis structura, ut necessitate quâdam mechanicâ, varii è sanguinis sinu secernantur humores. Illorum ad servandam valetudinem maxima utilitas. Si quâcunque de cauâ debitis in locis separari cessaverint, numerosa statim præsto est ægitudinum cohors. Num eretismo laborat glandulosa renum substantia? haud mora muriatico humore inquinatus sanguis totum genus membranaceum falsitudine suâ pungit, vellicat, inordinato, trahit in motus, urinam redolentia æger vomitu rejicit, delirat, convulsionibus universum quatitur corpus, mors tandem succedit miserrima, nisi artis beneficentissimæ auxilio, urinæ per renum colatoria restituantur secretio. Num obstructis quoquo modo, tendentibus ad hepar venæ portarum ramificationibus, bilis impeditur separatio? æger fastidit cibos, ingesta male concoquit, Alvus siccescit, os amarescit, lotium croceo colore infectum redditur, Erysipelate, aut etiam Phlegmone scedatur cutis. Adeo massæ sanguinæ permixtos remanere varios humores periculosum! nec minora sanitati imminet damna, ubi ex aliorum consortio extricatus, humor quilibet (negato exitu) propriis hæret in conceptaculis, vel inde à vasis lymphaticis exfugitur ad sanguinem deferendus. Quoties ab intempestivâ perspirationis insensibilis suppressione, sævissimis Rheumatici doloribus, torquentur membra, atrocissimis Podagræ cruciatibus divexantur articuli? Quot ab eadem causâ repetendæ Pleuritides, Peripneumoniæ, Diarrhææ, febres catarrhales, Anginæ, Ophthalmiæ? Quot ægros tumulavit latex urinosus, in corpore retentus aut à vesicæ Paralyti, aut ab ejusdem sphincteris contractione spasmodicâ, vel etiam à calculo ureteris viam claudente? Quantas sæpè parit tragedias, in jecore secreta bilis, liberum per ductus hepaticos iter non inveniens? Quin & ipsarum facum in intestinis remota gravissimos nonnunquam efficit morbos, hæmorrhagias, vertigines, hemicranias, dolores colicos, passionem iliacam. Numquid non à suppressis mensibus funestissima pullulant aliquando quæ mulieres adoriuntur mala, hæmoptylis, vomitus cruentus, hysterica passio, comatosi affectus, convulsiones, cordis palpitatio? numquid impeditus in puerperis Lochiorum fluxus, Apoplexias quandoquæ non producit lethiferas, crudelia ventris tormina, immanes Cardialgias, uteri inflammationem, aliaque horrenda generis ejusdem symptomata. Quisquis igitur tranquillios absque dolore soles condere expetit, institutam à naturâ variis in organis humorum separationem ferari non sinat: hanc convenienti sex rerum non naturalium usu promoveat; grande credat piaculum, secreti cujuslibet humoris ab organo secretorio effluxum omni operâ non adjuvasse, illudque habeat tanquam causa plurium morborum frequentissima, quos præcavere longè facilius est quàm expugnare.

## I I I.

**Q**UEMADMODUM à secundo ad septimum usque circiter ætatis septenarium, mensium fluxu carere tutò nequit femina non prægnans, ita & matrem impunè ab infantem nutritione discedere difficillimum est. Eadem lactis quæ Catameniorum materia, quæ lactant mulieres per uterum non repurgantur, id saltem rarò contingit. Uterque humor in corpore muliebri superfluous. Illius egestio ab uteri peculiari fabricâ pender, alterius ab infantis lactu perficitur. Quot & quantos matri impendentes avertat morbos ab ejus ubere pendens puerulus, ostendit natura lactis attentius considerata. Triplex lac constituit substantiâ, aquea, & serum audit; salino terrea, caseum dicunt; oleosa tandem, quæ butirum nuncupatur. Quiete diuturniori secedunt ab invicem heterogenea hæc lactis principia. In excretoriis mammarum non lactantium tubulis quiescit lac. Quid inde? triplicem resolvitur in substantiam. Oleosa sibiimet permixta acris fit & rancida,

continentia vasa stimulat, erodit; tum vasorum lymphaticorum ope (numerosa in mammis reperiuntur) ad sanguinem reuēta, motuque circulari abrepta, accenditur astuat, alios humores exagitat, febres parit inflammatorias. Aquea pars utpote fluidior, massam sanguineam rursus ingreditur, per renes amandanda, quandoque sub feri tenuioris formā papillis exit. Quid interim de caesosa parte? sero in dies spoliata, crassescit, induratur, in tubulis Galactophoris congeritur, gypseam æmulatur soliditatem, uno verbo in schirrum degenerat, hinc vicina comprimuntur vasa sanguifera, hinc impedita in mammis circulatio, hinc inflammatio, suppuratio, cancer exulceratus letho sapissimè finiendus. Quò quis humor à sanguine separandus, circulationi minùs idoneis & crassioribus constat partibus, eò intra sanguinis massam hunc retineri periculofum magis. Falem esse lactis indolem perse patens est. Quantis itaque ægritudinibus non lactantes scēminas plecti necessum est? praterquàm quòd superfluo ac inutili humore non liberantur, sicque ipsis metuendū sunt quotquot à plethora natales ducunt morbi, ille est insuper lactis genius, ut facillimè spissescat & grumos agat: plethoræ igitur adijunget se comitem Cacochymia. Qualis porro Cacochymiae species? cænosa & lutulenta humorum Diathesis, fluiditatis inimica. Lacteo humore luxurians sanguis, omnes vitiatib secretiones, hærebit in capillaribus mille pariet obstructiones mox datas progeniem vitiosiore.

## I V.

**H**ACTENUS ratione stabilitam de noxis ab effuso (ut vocant) lacte sententiam, heu frequens nimium! ulterius confirmat experientia. Decumbentes à partu adeamus non lactantes puerperas. Dictū horrendum, quàm multa, quàm crudelia, quàm pertinacia, ipsas undiquè circumveniant incommoda! Modò vultum occupat Erysipelas, indè tumet facies doleque, scintillant oculi, pulsant tempora, lancinans adest capitis dolor, toridem retenti intra molem sanguineam lactei humoris partus infelices. Modò lymphæ lentior facta, hîc & illîc moras necit, cumulatur in glandulis, tumores gignit durissimos, Parotides, strumas, schirros. Modò imparibiles non lactantium femora distrahit dolores, ingensque medentibus faceffunt negotium. Aliàs incarcerationum in matris corpore, recens nati alimentum præ calore expanditur, febresque accendit varii generis, quas inter exanthematicæ omnes, præsertim quæ purpurata dicitur, sive rubra sit Purpura, sive alba, magnoperè pertimescendæ. Clinicis notissimum est lacteum succum passim per viscera & artus vagantem, abscessus aliquandò generare periculosissimos non nisi ferro debellandos, quibus in speciem sanatis, alii non deficiunt pari arte oppugnandi, sapiusque cum pari successu. Nonnunquàm ab ingrata matre pœnas repositit pleuritis gravissima, illamve exhaurit fluens alvus, confodit penè, atrox intestinorum inflammatio, molesta argit suffocatio. Quandoquè ipsius lactis afficiuntur receptacula, quibusque deliquit, in iisdem potissimum partibus mulctatur parens inhumana, mammæ varii infestant tumores, ulcera deturpant, canceri exedunt. Est & ubi in mali partem trahitur uterus, taboque & sanie diffuit humani generis officina. Hæ sunt quas secum Galliis inulit pestes, prolem non lactandi molestissimas. Tot procellis jactatam non vivunt vitam illarum regionum mulieres, apud quas naturam sequendi ducem maxima religio, vetat infantes conductitiis mammis alendos tradere.

## V.

**A**TTAMEN, inquires, multæ sunt non lactantes scēminæ quæ optimâ fruuntur Valerudine. Quid ad nos? si partu frequentissimo satiscant tandem illarum vires, solidorumque si angatur Elater, undè proles numerosa quidè sed debilis, utpote infirmo in corpore generata, Hæc vitant incommoda quæ prolem nutriunt:

matres. Ita enim est statutum à naturâ, ut Venëris præmia rarissime ferant nutrices, Uterum agro non ineptè comparaveris, non secus ac agri interpositâ quiete non reparati, effæteri fiunt, raramque emittunt segetem, uterus pariter non intermisso partu exhaustus, conceditum sibi, malè educat hominis germen. Quandiu lactat mulier, amissum uterus recuperat tonum novæque accipit vires, ut pulchrâ sanâque prole rursus beet parentes. Procul hinc malefaua quorundam consilia, qui se-xui (haud dubiè colendissimo) blandiendo nimis, ipsum crudeliter enecant. Quid molestiùs, inquirunt, quàm clamores inter & ejulatus infantis, vitam trahere? Quid tædiosum magis quàm puerulum ulnis continenter gestare, ipsiusque ad ora papillas idem idem admove-re. Egregia profectò difficultas! Quasi verò huic quoque rei maximè subventum non esset à naturâ. Hæc quippe tantam maternis animis in-natos caritatem iniecit, ut quicquid prolis causâ susceperint, nedum cum tædio & molestiâ, quin etiam incredibili cum gaudio illud aggrediantur: imò visæ sunt primiparæ quas ex avulsâ prole, alienis uberibus nutriundâ mæror extulit inconsolabilis. Sed dicant vicissim, num satiùs est torqueri morbis periculosissimis? Num gravia sunt minùs gestationis incommoda, cibi fastidium, Pica, Malacia, absurdorum appetitus, Cardialgia, Nausea Vomitus, Stranguria, Dysuria, Tenesmus, Hemorrhoides, crurum iustatio & inde subsequens difficilis progressio? Verùm in-surgunt alii, adsunt rationes quibus præcaveantur noxæ ab effuso lacte oriundæ, aut etiam ejusdem impediatur effusio. Felicem utinam sortirentur effectum tot adhiberi solitæ in non lactantium morbis, evacuationes omnis generis. Præterea nonne insipientis est morbum etiam curatu facillimum consultò admisisse, qui facillimo declinari poterat negotio? Ergo canibus ultrò offerent mammas mulieres, quas infantibus illa non aliundè provenit, quàm ex eo quod materua non fuxerunt ubera, sed & ipsi optimè medetur infantum nutritio; hujus enim ope foras emittitur humor qui mole suâ gravaret partes, huic oneri ferendo præ suâ molli-tie impares; & id adeo verum est, ut inter faminas non lactantesq; illæ gravius ægrotent quæ vitreâ, ut ita dicam, donantur valetudine. Malâ igitur non ampliùs utantur matres consuetudine, eoque majora sibi ex prolis lactatu spondeant emolumenta, quod dùm eas nutriendi infantes cura tenet, nec mensis opiparis accumbendi, nec in seram noctem cœnas protrahendi tempus superest, sicque permultas morborum effugient occasiones. Quid plura? Concludamus,

*Ergo prolem lactare Matribus saluberrimum.*

Proponēbat Parisiis JOAN NES-BAPTISTA LANGLOIS, Abrincensis,  
Doctōr Medicus Remensis, necnon Saluberrimæ Facultatis Medicinæ Parisiensis  
Baccalaureus, A. R. S. H. 1765, A SEXTA AD MERIDIEM.

Typis QUILLAU Facultatis Medicæ Parisiensis Typographi, viâ du Fouarre, 1765.